

Voorwoord

Aan ons graad vyf kategete

Dit is 'n baie groot voorreg om kinders te kan onderrig in die weë van die Here. Om met kinders in hierdie fase van hulle ontwikkeling te kan werk, stel heerlike uitdagings. Daar is verskillende metodes waarop 'n mens die inhoud van die lesse aan die kinders kan oordra. Gebruik eie inisiatief met die aanbieding van die lesse. By elke les word stap vir stap vir jou aangedui hoe jy die les kan aanbied. Maak die kinders deel van jou aanbieding deur klasdebatte, groepbesprekings en ander metodes.

In jou voorbereiding moet jy altyd onthou om nie net die les in die kategeet se boek deur te werk nie, maar ook die les in die kind se boek. Dit sal jou baie help met jou aanbieding.

Nog 'n lekker uitdaging wat die boek bied, is dat die ouers ook by die kategeses betrek word. Maak seker dat die ouers die gesinslesse saam met hulle kinders bywoon. Dit kan 'n aangename leerervaring vir kinders sowel as ouers wees.

Gryp die geleentheid om die kinders van die Here te leer met albei arms aan. Dit is 'n voorreg en 'n roeping van die Here self.

Ds Willem Kok
Hoofsamsteller

So werk die kategeses

Alle lesse is volledig vir die kategeet uitgewerk, maar voorbereiding is van kardinale belang omdat daar by baie geleenthede hulpmiddels gemaak moet word, en persone soms gereël moet word om met die aanbieding te help. Soms moet uitstappies vooraf gereël word.

Baie belangrik: Onthou, as die kinders gekontroleer word op die vorige week se werk, MOET HULLE BOEKE TOE WEES, anders dien dit geen doel nie.

Die kategesereeks waarvan hierdie boek deel is, werk op die volgende basis: Daar bestaan drie fasegroepe van graad R tot by graad 10. Graad R tot graad 3 vorm die eerste fase, graad 4 tot graad 7 die tweede fase, en die laaste fase is graad 8 tot graad 10. Daar word deurgans vier tipes lesse in elke boek vir alle grade aangebied.

- **Graadles**

'n Graadles is 'n les wat vir die kinders van daardie spesifieke graad geskryf is. Dit is 'n *gewone* les soos ons dit altyd geken het en word op die *gewone* manier aangebied. Die getal lesse wissel van twee tot drie per kwartaal. Waar daar net twee lesse is, is die derde een altyd 'n hersieningsles.

- **Gesinsles**

'n Gesinsles is ook vir kinders van 'n spesifieke graad geskryf, maar met die verskil dat die ouers saam met hulle kinders die geleentheid bywoon. Dit word een keer per kwartaal aangebied. In die lig hiervan moet die ouers gewoonde gemaak word om as deel van die nakoming van hulle doopbelofte hierdie deel van die kategetese saam met hulle kinders deur te maak. 'n Gesinsles is altyd so saamgestel en word so aangebied dat die hele gesin daarby betrokke raak. Die fokus van hierdie lesse val op gesins- en ouer-kind-verhoudings. Die betrokkenheid van gesinne in die hele gemeenteposet word ook hier veronderstel. Omdat ouers bewus moet wees wanneer hulle die lesse moet bywoon, moet kategete reeds aan die begin van die jaar datums aan ouers voorsien en hulle kort voor die les weer herinner.

- **Faseles**

Faselesse word aan al die kinders van 'n spesifieke fase aangebied: Graad R tot graad 3, of 4 tot 7, of 8 tot 10. Hier val die klem op gemeenskaplike sake wat relevant is vir kinders van daardie fase. Aldrie of alvier kategete van 'n spesifieke fase moet dus seker maak dat roosters nie bots nie en wie verantwoordelik gaan wees vir die aanbieding van daardie les. Ter wille van die samehorigheidsgevoel en dissipline moet aldrie of alvier kategete teenwoordig wees wanneer die les aangebied word.

- **Praktykles**

'n Praktykles is 'n les wat ten doel het om ons geloofskennis te laat uitmond in fisiese geloofsdade in die praktyk soos ons lees in Jakobus 2: 17: *So gaan dit ook met die geloof: as dit nie tot daad oorgaan nie, is dit sonder meer dood.* Daar moet by hierdie lesse daarop gelet word dat dit soms baie voorbereiding verg in die sin dat afsprake met individue of instansies gemaak moet word, reëlins getref moet word met betrekking tot vervoer, ensovoorts. Kyk reeds aan die begin van die jaar na al die praktiese lesse en tref betyds reëlins na die aard van elke les.

'n Slotwoord van my kant af: Mag jy vanjaar met jou betrokkenheid by kinders krag, insig, geloof en verantwoordelikheid van die Here ontvang. *In Christus se voetspore* sit jy deur die leiding van die Heilige Gees as't ware ook jou arms om kindertjies, lê hulle die hande op en seën hulle. So verkry jy 'n eervolle plek in die gemeente, groot sekerheid in jou geloof in Christus Jesus, en sal jy na hierdie lewe deel in die vreugde van jou Here.

Dr Hannes Beukes
Hoofredakteur

Medewerkers

Mev Elmarie Deale
Mev Magda Kok